



園丁的話: Lim Chùn-iók

李登輝學校 招生

2005年海外青年精英班(35歲以下)kap 2005年海外台灣人國是研習班(70歲以下), 研習時間: 2005年8月13日~8月19日, 請上李登輝學校網站 http://www.leeschool.org.tw 下載申請書。

《靜思小語》Chhng-su Sió-gí

談時間 Tām Sî-kan

釋證嚴 著

7) 人生無一定
Jîn-seng bó it-tēng
Ták 粒 lóng 是好球,
Ták liáp lóng sí hó kiú,
但是
Tân-sí
經過磨練 ē 打者,
Keng-kòe bôa-liân ē tá-chiá,
隨時 lóng ē-tàng 揮棒,
Súi-sí lóng ē-tàng hui-pōng.

8) 生命無常,
Sî-miá bù-sióng
慧命永存;
Hui-bêng éng-chùn;
愛心無涯,
Ài-sim bù-gái,
精神常在。
Cheng-sín sióng chái.

9) 人生無常,
Jîn-seng bù-sióng,
生命只是吐喘氣之間,
Sî-miá chí-sī tī chhóan-khùi chí kan,
一秒間 bē-tit 過關,
Chit bió kan bē-tit kòe-koan,
生命就結束 lah。
Sî-miá chiū kiát-sok lah.
所以, tiòh-ái 好好把握
Sô-í, tiòh-ái hó-hó pá-ak
每一分、每一秒。
Múi chit hun, múi chit bió.

台灣鄉土大篇小說連載(38)

鄉史補記 (四)

陳雷

Ta 父 á-kiá" ai" 糖 ai" 鹽來到烏竹林, 老父作前, 阿 kiá" 作後, 一人取一支竹枋 ná póe ná 入去。行到深來, he 竹 烏 lú am, 日頭遮 kah beh 無看。深林內熱人蟬當 káu, 幾千幾萬隻 竹尾哭, 「tī chia tī chia tī chia tī chia。」Chit-pēng 哭了 tiòh hit-pēng, hit-pēng 哮了 tiòh chit-pēng, 「tī-chia tī-chia tī-chia, tī-chia。」黃薯 oat 頭講: 「紅嘴 chē 哮 lé-lé, 定 tiòh 蛇 tóh chē! 細 jī tòe 我後腳行。」一句話 tú-chiah 講 soah, m̄ 知按 tó 位雄雄 chōng 二個賊出來! He 賊一個 ló 一個矮(é), pín-á-骨 thng 赤赤, 手舞一支番刀, soah 面也無 phah 虎 niu: 「人過物無過, 留命先留貨!」Chōng 來搶竹籠。黃薯 m̄ hō 伊搶, 用竹枋 kap 伊 bú。He 賊看阿餘毛龜細漢, tóh 來衝伊, 掛籠 á ián 倒 tī 土腳, 番刀 giáh 起來 tóh beh phut。阿餘毛龜 tiòh 狂大聲 hoah: 「海 a! 海 a! 你 chia" 實阿姊 thài 會落?」He lò 腳賊聽叫伊 é 名, chhoah 一 tiò, 停手問: 「你 thài 叫我 é 名?」阿餘毛龜應: 「Gōng 小弟, 我你 é 阿姊, thài m̄ 叫你 é 名?!」海 a 受氣罵: 「烏白講, 我阿姊早 tóh 死!」刀 giáh 起來 beh koh phut。阿餘毛龜 hoah: 「海 a, 阿姊出 chu 死, koh 再出世, 阿姊 siōng-kài siàu 念你。」海 a 心內奇怪, 若 m̄ 是我阿姊, ná 會講是出 chu 死? He gin-á 雙手 ká 頭毛 phián 開, hiáh-á 頂一粒一粒出 chu 釘 è khí 滿滿是。海 a 大驚一 tiò, hoah: 「鬼! 鬼!」Oát 頭 tóh 走。另外 hit-é 矮 á 賊, 家已無膽, he 賊膽是借來 è, 聽 tiòh hoah 鬼, 也無看真 tóh 走。阿餘毛龜看賊去, peh 起來 chhōe 老父。He 老父一 kho 人神神坐 tī 竹 phō 腳, 叫也 bē 應, 嘴裡直直念: 「人過物無過, 留命先留貨!」僥倖 a, tóh 是 chit-é 黃薯 hō 賊驚一下破膽, 身魂走出竅 a, 叫也 m̄ 知人。阿餘毛龜 ká 老父扶起身來, 講: 「阿爹, 賊去 a, 咱緊來去 tng。」

Àh kám 有影阿餘毛龜 tóh 是 lò 腳賊 é 阿姊來出世? Beh thài 有人知? M̄-kú he 賊 kap 羅漢脚時常來 tī 佳里興街 á 放蕩, 一來瞻 (chiam) 好空 é sit 頭 thang 好偷, koh 來等店頭家有時去 giá 貨作 摺工, thàn 幾分錢。Chit 日早晡 tī 雙發利頭前無聊放蕩, he 羅漢脚講: 「Chiá" 久無食雞, 想 kah 牙槽酸。」另外一個頭殼生臭粒 á 講: 「牙槽酸, 用 kóng 槌 á kóng tóh 好。」海 a 講: 「Beh 食雞, 叫咱 chit-é 阿兄園裡掠。」Chit-é 二仙銅錢 tóh 是會曉講雞話, 看 tiòh 雞角 kek 雞母叫, 看 tiòh 雞母 kek 雞角叫, he 雞 tóh óa 來 hō 伊掠, 所以偷掠雞專門。牽歌 á 調罵伊: 「海 a, 海 a, 你 m̄ 是我親家, 也 m̄ 是我娘, 我 thài 有 thang 掠雞來

台灣文學系 kám 是謀殺台灣母語 é 共犯! ?

蔣為文 Chiú" Ūi-bún

若 chún 翻開全球殖民地 é 歷史, 咱 ē-tàng 發現絕大部分 é 殖民地 tī 達成政治獨立了, 原有 é 外來政權 lóng 撤出殖民地 koh tng 去到 in 原有殖民者母國。像講, 越南脫離法國獨立了, 法國殖民政權 ùi 越南撤出 koh tng 去到法國母國; 韓國脫離日本殖民統治了, 日本殖民政權 mā ùi 韓國撤回日本。

台灣 ùi 17 世紀到 ta" 陸續受 tiòh 無 kàng 外來政權 é 殖民統治。Chit-kóa 外來政權當中, 大部分 lóng tòe tiòh 殖民政權 é 落幕 toa" á 離開台灣, 像講早期 é 荷蘭 kap 近期 é 日本總督。M̄-koh mā 有 chit kóa 因為殖民者失去殖民母國、無法度 tng 去 soah tòh ài 寄生 tī 殖民地 é 例。像講早期 é 鄭氏王朝 kap 近期 é 中華民國 tóh 是 chit 類 é 寄生政權。

一般 tek 來講, 殖民地 tī 脫離殖民政權獨

立了, 雖然 tī 政治形式頂頭達成獨立, m̄-koh tī 其他領域親像經濟、文化、文學等 soah 無一定 ē-tàng 擺脫舊殖民政權 é 陰影 kap 掌控。這就是所謂 é 後殖民現象。

Hōan-sè 有人會問, 台灣 kám 已經結束殖民時期 kiá" 到後殖民 é 階段 à? 無 kàng é 學者 hōan-sè 有無 kàng é 見解。在我看來, 2000 年本土政黨 「民進黨」 選贏總統大選, chit 年勉強 ē-tàng 算是近代中華民國殖民 kap 後殖民時期 é 分界點。

台灣政治 é 本土化象徵台灣 tī 中華民國殖民體制 ē-kha 踏進後殖民時期。Tòe tiòh 政治本土化 é 前進, 台灣本土語言文化 mā 踏進後殖民時期 é 重視。像講 chit kúi 年來, 台灣各大學陸續成立 bē chíó 台灣文學 kap 台灣語言 é 相關系所。Chit 款趨勢 kah-ná 表明本土語言文化已經出頭天, 已經擺脫舊殖民政權 é 陰影 á。M̄-koh, kám 真正 án-ne? 若 chún ùi 各大學台灣文學系所開設 é 課程、舉辦 é 研討會 kap 發表 é 論文來看, 華語 kàng-khóan iáu 維持絕對優勢 é 份量, ah 本土語言所佔 é 比例 kàng-khóan 真偏低。



台灣鄉土畫家何文祀教授四十多年來所追尋的台灣鄉土之美。

因為寄生政權 khah 好掩護伊外來統治 é 本質, 致使當前各大學台灣文學系所 soah 普遍認同 「華語」 是 「台灣話」、m̄ 是殖民者 é 「外國話」。Chit 款 「認同混淆」 現象顯示, 現此時台灣母語 (包含原住民語、客語、台語) é siōng 大危機 tòh tī leh 「華語」 當 teh 透過教育體制進行 「內化」 thang 合理化伊 tī 台灣使用, 甚至是取代台灣母語 é 正當性。也就是講 「華語」 當 teh 踏進後殖民 é 承認做 Holo、客家、原住民族 é 新母語。當 tong 使用華語 é 正當性 hōng 確立了, 其他族群恢復使用族群母語 é 意願 ún-tàng 相對降低。咱 beh 問, 若 chún 「華語」 ē-tàng 是 「台灣話」, 為怎樣 pē-pē 統

治台灣 50 冬 é 殖民者語言 é 「日語」 bē-tàng chiá" 做 「台灣話」? Hit-kóa 來自西方國家 é 傳教士像講 「巴克禮 (Thomas Barclay 1874-1935)」、「甘為霖 (William Campbell 1871-1918)」、「馬偕 (George L. Mackay 1844-1901), 為台灣奉獻一世人 koh 留落 bē chíó 用英文寫 mē é 台灣文獻, 是 án-chóa" in é 母語 「英語」 bē-tàng 號做 「台灣話」, soah tòh hōng 列做外國語? Iáu koh 有 hit-kóa 來自東南亞所謂 é 「越南新娘」、「Kam-po-ti-a 新娘」 é 新新台灣人 é 母語 「越南語」及 「Kam-po-ti-a 語」, thài 無改號做 「台灣話」?

事實上, 華語 ē-sái 是台灣國 é 「國民 é 語言 (languages of citizens), m̄-koh 絕對 m̄ 是 「台灣語言 (Taiwanese languages)。華語、英語 hām 越南語 kap 其他新移民 é 語言 kàng-khóan, ē-sái 是台灣 é 國民 teh 使用 é 語言之一, m̄-koh lóng m̄ 是具有台灣傳統歷史文化代表性 é 「台灣語言」。假使馬英九、宋楚瑜、連戰等 chit-kóa 中國人, 願意認同台灣 koh chiá" 做台灣國 é 新住民, in 當然有選擇使用 「華語」 做 in é 母語 é 權利。M̄-koh 這並無代表 in 有拒絕學台灣語言 é 權利, koh khah 無代表其他族群 lóng ài 放棄原有族語, 有改用 「華語」 做母語 é 義務! M̄-koh 真可惜 é 是, 有 bē-chió 台灣文學 é 研究者 soah 陷入思考 é lō-ko-môai, 自認為接納華語、放棄台灣母語 chiah 是 「包容心」 é 表現。Chit 款 「包容心」 é 具體表現, 就 tī leh 台灣文學系所 é 入學考試 kap 課程設計當中: lóng 用華語做主體、ká 母語當做 m̄-chiá" m̄-mih。像講, 真 chē 台文系所 é 入學考試 kan-ta" 考華語、無提供考生選考台灣母語 é 權利; 課程 kan-ta" 要求必修第二外語、soah 無要求修台灣母語; 上課 kan-ta" 講華語或者日語寫作 é 作品、soah bē-giàn 介紹母語文學。Chit 款 é 台灣文學系根本 tòh ài 正名做 「中國文學系現代組」 chiah tiòh! Hit-kóa kiò-sī ka-tī 心胸廣大 é 「母語文盲」, 若 beh 講是 「包容心」 é 表現, khah 輪講是甘願做謀殺母語 é 共犯, thang 維護 in 既有 é 中文既得利益 niā-niā。

若 chún 台灣已經 kiá" 入後殖民 é 時期, 頂面講 m̄ é 台灣文學系所充滿殖民時期 「國語政策」 陰影、排斥台灣母語 é 現象 tú-hó 是 siōng-hó é 例。

《荒漠甘泉台語詩》 (15)

Ū Chú Chhōa Lō 有主 Chhōa 路

陳清俊 Tân Cheng-chùn 譯著

Sió-chùn hōai"-kè pòk-hong tōa-éng é hái, 小船橫過暴風大湧 é 海, Tōa-éng siàu lái, kiōng-hong chhè lái, 大湧囉 (siàu) 來, 強風吹來, O-ám tiōng, ū àm-chiòh gú-hiám tē-kài, 烏暗中, 有暗石危險地界, Só-ū chiah è, Tōa chún-tiú" lóng-chóng chai, 所有 chiah-é, 大船長 lóng 總知。

Ū-sí àm-bū lái, só-ū teng-hé lóng hoa khi, 有時暗霧來, 所有燈火 lóng hoa 去, M̄-chai che sió-chùn beh tó-ū khi, M̄-知這小船 beh tó 位去, Tng-tng é àm-mi, bô thang hioh é si, 長長 é 暗暝, 無 thang 歇 (hioh) é 時, Tōa chún-tiú" bēng-pèk góa khak-sin é sim-i, 大船長明白我確信 é 心意。

台語五言詩一顏敏政 Gân Bin-chèng

Kào-san bô sé bīn

猴山無洗面

Kào-san bô sé bīn, 猴山無洗面, Han-chi hng hām-bin; 蕃薯園 hām 眠; Tào-hang pi" thé-bin? 投降變雙面? [Kok-bin] ài [jīn-bin]! [國民]愛[人民]!

請來讀、寫、講咱 é 母語, 這是台灣建國 é 第一要緊

請來參觀:

- 1) 台灣公論報台語文專刊-蕃薯園 網站: http://lomaji.com/han-chi-hng
2) 世界第一 é 台語線頂聖經網站: http://seng-keng.lomaji.com
3) 台日大辭典台語摘譯網站: http://taigi.fhl.net/dict

阮有提供:

- 1) 台灣布袋戲劇本、karaoke CD kap 示範錄影 VCD (台語版 kap 英語版 lóng 有)
2) Basic Taiwanese/Lái Òh Tâi-gú/來學台語 é 語版教材 CD (製造中)



Boston 台語進步社 (Boston Taiwanese Progressive Society)

http://groups.yahoo.com/group/TPS_BOSTON, E-mail: chuniok@lomaji.com